

15/03/2004

Mahasiswa kini bebas pengaruh politik kepartian

Mohd Saifullah Mohd Zulkifli

KAMUS sejarah pergerakan mahasiswa membuktikan pergerakan dan aktivisme mahasiswa banyak menyumbang kepada pembangunan ekonomi dan sosial negara. Antara persatuan pelajar terawal yang wujud pasca kemerdekaan termasuklah Persatuan Kebangsaan Pelajar Islam Malaysia (PKPIM) dan Gabungan Pelajar Melayu Semenanjung (GPMS) yang membuktikan kejayaan mereka di dalam menyumbang kepada pencapaian kita dalam banyak bidang.

Antara kejayaan yang dapat dibuktikan adalah percambahan institusi pendidikan seperti Universiti Kebangsaan Malaysia (UKM) dan Universiti Islam Antarabangsa Malaysia (UIAM), pengupayaan menjadikan bahasa Melayu sebagai bahasa kebangsaan dan pembinaan masyarakat berlandaskan kepada jati diri ketimuran dan keagamaan.

Kejayaan ini adalah bukti yang tidak dapat dinafikan hasil jaringan erat yang membentuk penyatuan di kalangan golongan pelajar ketika itu. Dasar dan hala tuju yang jelas diterapkan bagi mencapai visi dan misi menjadi batu loncatan kepada kejayaan perjuangan pelajar.

Berdasarkan buku Visi Kepimpinan Abad ke-21 telah dinyatakan di dalam visi ke-2 "kepimpinan yang bergerak secara objektif dan bersusun menjadi elemen utama di dalam satu-satu perjuangan. Inilah kayu ukur bagi menilai kejayaan."

Satu kejayaan yang mampu ditunjukkan oleh pimpinan pelajar pasca kemerdekaan adalah apabila mereka mampu untuk memugar budaya ilmu dan nilai aktivisme yang dicurahkan kepada masyarakat.

Slogan "mahasiswa juru bicara masyarakat" juga bukan omong-omong kosong. Bukan itu saja, tetapi kejayaan yang besar adalah kejayaan mahasiswa ketika itu adalah terbinanya satu kesatuan pemikiran (wahdatul fiqr) dan perpaduan berteraskan keadilan.

Dinyatakan juga di dalam buku Visi kepemimpinan abad ke-21 dalam visi yang ke-4, "kepimpinan abad baru mengutamakan perpaduan berteraskan nilai perpaduan dan pembinaan wahdatul fiqr' (kesatuan pemikiran)".

Di sini juga dinyatakan oleh Dr Taha Jabir "pembinaan tembok-tembok pemikiran menjadi punca kepada banyak masalah umat kini, etika berbeza pendapat (adabul iktilaf) tidak diikuti, justeru masalah inilah yang perlu diatasi".

Melihat keberkesanan kepemimpinan mahasiswa era pasca kemerdekaan, kejayaan mereka menjatuhkan tembok perpecahan dijadikan faktor utama kepada penyatuan.

Pergerakan yang bersifat 'independent force' dan segala jasa yang ditaburkan adalah berdasarkan inspirasi idealisme mahasiswa yang tulus ikhlas menyumbang kepada kepentingan masyarakat menjadikan mereka disanjung.

Mereka sama sekali bebas daripada pengaruh politik kepartian yang akhirnya hanya membawa idea parti politik tanpa membawa pendirian sebagai golongan pelajar.

Jika kita melihat kepada aspek kontemporari, mahasiswa kita mempunyai satu entiti yang baik iaitu kepekaan kepada isu-isu semasa terutama terhadap politik dan kecenderungan untuk menjadi ejen pengubah masyarakat.

Jika entiti ini melangkau ruang dan lapangan mahasiswa, ia mampu untuk membawa kepada politik yang tidak sihat. Isu-isu yang membabitkan siasah ini jika tidak dilihat secara akademik dan ruang lingkup mahasiswa yang sebenar, maka ia mampu untuk dijadikan sebagai isu yang dilihat di dalam kaca mata kepartian kepada pergerakan mahasiswa.

Lebih malang lagi jika pendirian dan ideologi yang dibawa tidak lagi tulen dan tidak membawa inspirasi pelajar. Sudah pasti ia memberikan kesan tidak baik kepada semua pihak.

Isu dan pendirian yang dibawa adalah yang dilaungkan oleh parti politik kurang sesuai kepada mahasiswa. Lebih dikhuatiri jika mahasiswa menjadi kuda hitam tunggangan parti.

Antara perkara yang tidak sihat di dalam ruang lingkup politik kampus adalah penglabelan ekstrem. Individu tertentu juga semacam mengadakan propaganda memecah-belahkan pimpinan pelajar dengan label propembangkang dan prokerajaan.

Tindakan yang dilakukan pada 10 Mac yang lalu oleh pimpinan mahasiswa daripada 15 institusi pengajian tinggi (IPT), berikrar untuk tidak terbabit dalam parti politik adalah baik dan perlu dilihat secara positif serta ikrar yang ditujukan adalah merangkumi semua parti.

Perlu diingatkan juga, ini bukanlah bermaksud mahasiswa tidak boleh terbabit dalam arena politik. Menteri Pendidikan, Tan Sri Musa Mohamed berkata, "kementerian menggesa supaya mahasiswa kita tidak membabitkan diri dengan kempen atau sebagainya tetapi ia tidak bermaksud mereka tidak boleh menjadi pengundi."

Sesuatu yang positif juga jika mahasiswa dapat memantau pilihan raya dan mengambil peluang untuk melihat melalui kaca mata sendiri proses pilihan raya itu berjalan di berlandaskan konteks akademik.

Jarak masa satu-satu pilihan raya yang diadakan adalah lama, iaitu lima tahun sekali, maka mungkin ada di kalangan mahasiswa tidak dapat mengalami sendiri pilihan raya di dalam tempoh belajar.

Apatah lagi pergerakan dan agenda mahasiswa ini secara dasarnya adalah 'politically oriented'.

Sejarah sekali lagi membuktikan hubung jalin antara kelompok pelajar dengan persekitaran masyarakat telah memberikan arus ombak yang deras kepada kemerdekaan Tanah Melayu.

Antara nama besar termasuklah Tun Dr Mahathir Mohamad, Abd Wahab Muhammad dan lain-lain. Kelompok pelajar seperti ini telah mengadakan suatu gerakan kesedaran terhadap bahayanya Malayan Union dan kepentingan ilmu kepada masyarakat. Tindakan inilah yang amat signifikan dan memberikan impak yang tinggi ketika itu.

Sebenarnya metodologi pergerakan mahasiswa perlu keluar daripada tampuk lama. Suatu pendekatan yang lebih berhikmah berorientasikan objektif diperlukan. Pendekatan yang lebih bersifat objektif dalam erti kata menilai aspek di dalam mencapai matlamat.

Perkara baik mesti dikatakan baik walau dari mana ia datang manakala perkara buruk mesti dikatakan buruk. Kita tidak harus menjadi penyokong atau pembangkang yang melulu. Konsep mengajak kepada kebaikan dan mencegah daripada kemungkaran perlu diaplikasikan.

Saya menyeru agar mahasiswa yang amanahnya sebagai satu golongan cerdik pandai yang berada di tengah-tengah masyarakat perlu berusaha bersungguh-sungguh untuk mengembalikan solidariti mahasiswa bagi kepentingan semua dan bukan untuk satu-satu tujuan sempit semata-mata.

Justeru, formula pertama yang harus dibuat adalah dengan meruntuhkan tembok penghalang kepada penyatuan dan mula membina titik persamaan. Pendirian dan ideologi yang bebas dan telus perlu dikembalikan dalam membina identiti mahasiswa abad baru.

MOHD SAIFULLAH MOHD ZULKIFLI
Universiti Islam Antarabangsa